



O'ZBEKISTON RESPUBLIKASI YOSHLAR ISHLARI AGENTLIGI DIREKTORINING BUYRUG'I

20 25 y. " 10 " fevral

№ 01-10/22

O'zbekiston Respublikasi Prezidentining 2024-yil 4-dekabrdagi "Jamoaviy sport turlarini rivojlantirish va iqtidorli yoshlarni saralab olish tizimini takomillashtirish chora-tadbirlari to'g'risida"gi PQ-421-son qarori ijrosini ta'minlash to'g'risida

O'zbekiston Respublikasi Prezidentining 2024-yil 4-dekabrdagi "Jamoaviy sport turlarini rivojlantirish va iqtidorli yoshlarni saralab olish tizimini takomillashtirish chora-tadbirlari to'g'risida"gi PQ-421-son qarori ijrosini ta'minlash maqsadida

BUYURAMAN:

1. Qarorga muvofiq vazirlik va idoralarga mehnat jamoasining sog'lom turmush tarzini qo'llab-quvvatlash va jismoniy faollik darajasini oshirish maqsadida quyidagi vazifalar belgilanganligi ma'lumot va ijro uchun qabul qilinsin:

mehnat jamoasining sog'lom turmush tarzini qo'llab-quvvatlash va jismoniy faollik darajasini oshirish maqsadida ularda kamida uchta jamoaviy sport turlari bo'yicha sport klublari tashkil qilish;

ish vaqtidan so'ng belgilangan kunlarda (haftada kamida bir marta) idoraviy tashkilotlar rahbarlari mehnat jamoasining jamoaviy sport turlari bilan shug'ullanishini tashkil qilish choralarini ko'rish;

jamoaviy sport turlari bo'yicha idoraviy tashkilotlar kesimida "Rahbar kubogi", mahalliy hokimliklar kesimida "Hokim kubogi" musobaqalari o'tkazib borish;

sport musobaqalari g'olib va sovrindorlari sport musobaqalari tashkilotchilarining budjetdan tashqari mablag'lari hisobidan moliyaviy rag'batlantirib borish;

rahbar o'rinbosarlaridan birini jamoaviy sport turi bo'yicha sport klublari faoliyatini tashkil etishga mas'ul etib belgilash;

budjetdan tashqari mablag'lar va qonunchilikda taqiqlanmagan boshqa manbalar hisobidan jamoaviy sport turlari bo'yicha infratuzilmani yaratish choralarini ko'rish;

zarur sport infratuzilmasi mavjud bo'lmagan vazirlik va idoralar, xo'jalik birlashmalari, davlat ishtirokidagi tijorat banklari va korxonalar hamda ularning vertikal tuzilmalarining Sport vazirligi tizimidagi sport ta'lim muassasalari sport inshootlaridan asosiy mashg'ulotlardan bo'sh vaqtida shartnoma asosida foydalanishini yo'lga qo'yish.

2. Yoshlar ishlari agentligi va uning tarkibiy tuzilmalarida xodimlardan iborat tarkibda voleybol, gandbol, basketbol, futbol sport turlari bo'yicha yuridik shaxs maqomiga ega bo'lmagan sport klublari tashkil etilsin, ushbu klublar faoliyatini tashkil etishga mas'ul etib Agentlik direktorining o'rinbosari A.Muminov belgilansin.

3. O'zbekiston Respublikasi Prezidentining "Sog'lom turmush tarzini keng tatbiq etish va ommaviy sportni yanada rivojlantirish chora-tadbirlari to'g'risida" 2020-yil 30-oktabrdagi PF-6099-son Farmoniga asosan Yoshlar ishlari agentligi markaziy apparati xodimlari o'rtasida sog'lom turmush tarzi va ommaviy sportni rivojlantirish maqsadida Yoshlar ma'naviyatini yuksaltirish va bo'sh vaqtini mazmunli tashkil etish bo'limi bosh mutaxassisi Islomov Akmalxo'ja Akbar o'g'liga "Sport targ'ibotchisi" qo'shimcha vazifasi yuklansin va uning bazaviy lavozim maoshiga ushbu vazifa doirasida Agentlik xodimlarini sportga jalb etish bo'yicha amalga oshirgan ishlari uchun Agentlik markaziy apparatining budjetdan tashqari jamg'arma mablag'lari hisobidan 20 foiz miqdorida ustama belgilansin.

4. Yoshlar ishlari agentligi:

a) "Sport targ'ibotchisi" (A.Islomov)ga:

xodimlari o'rtasida sog'lom turmush tarzi va ommaviy sportni rivojlantirish maqsadida 2025-yil uchun ish rejasini ishlab chiqish;

jamoaviy sport va boshqa sport turlari bo'yicha "Rahbar kubogi" musoboqalarini tashkil etib borish;

sport klublari faoliyatini rivojlantirish bo'yicha takliflar ishlab chiqish va Sport vazirligi tizimidagi sport ta'lim muassasalari sport inshootlaridan asosiy mashg'ulotlardan bo'sh vaqtida shartnoma asosida foydalanishini yo'lga qo'yish bo'yicha taklif kiritish;

Inson resurslarini rivojlantirish bo'limi (S.Xamdamov) bilan birgalikda Agentlik markaziy apparati xodimlarini sportga keng jalb qilish choralarini ko'rish;

Ushbu buyruqqa muvofiq amalga oshirilgan ishlar to'g'risida Agentlik direktori va Moliya-iqtisod bo'limiga hisobot kiritib borish;

d) Moliya-iqtisod bo'limi (J.Rasulov)ga "Sport targ'ibotchisi" A.Islomovning bazaviy lavozim maoshiga Agentlikning budjetdan tashqari jamg'arma mablag'lari hisobidan 20 foiz miqdorida ustama to'lab borish;

e) hududiy bo'linmalariga xodimlardan iborat tarkibda uchta jamoaviy sport turlari bo'yicha sport klublari tashkil qilish va ularning faoliyatini yo'lga qo'yish vazifalari yuklatilsin.

5. Yoshlar ishlari agentligi direktorining 2021-yil 6-dekabrdagi “O‘zbekiston Respublikasi Prezidentining “Aholining jismoniy tayyorgarlik darajasini baholash tizimini joriy etishning tashkiliy chora-tadbirlari to‘g‘risida” 2021-yil 16-iyundagi PQ–5148-son qarori ijrosini ta‘minlash to‘g‘risida”gi 01-10/237-son buyrug‘i o‘z kuchini yo‘qotgan deb topilsin.

6. Ushbu buyruq ijrosini nazorat qilish Agentlik direktori o‘rinbosari A.Muminov zimmasiga yuklatilsin.

Direktor



A. Sa'dullayev



O‘ZBEKISTON RESPUBLIKASI PREZIDENTINING QARORI

2024 yil « 4 » декабрь

№ ПК–421

Жамоавий спорт турларини ривожлантириш ва иқтидорли ёшларни саралаб олиш тизимини такомиллаштириш чора-тадбирлари тўғрисида

Ўзбекистон Республикаси Президентининг 2024 йил 21 февралдаги “Ўзбекистон – 2030” стратегиясини “Ёшлар ва бизнесни қўллаб-қувватлаш йили”да амалга оширишга оид давлат дастури тўғрисида”ги ПФ–37-сон Фармони ижросини таъминлаш, шунингдек, жамоавий спорт турларига ёшларни кенг жалб қилиш ва иқтидорли спортчиларни саралаб олиш (селекция) ҳамда юқори маҳоратли спортчиларни тайёрлаш тизимини такомиллаштириш мақсадида:

1. Қуйидагилар жамоавий спорт турларини (волейбол, баскетбол, гандбол, регби, чим устида хоккей, сув полоси) ривожлантиришнинг асосий йўналишлари этиб белгилансин:

ёшларнинг жамоавий спорт турларига қизиқишини ошириш, уларнинг жамоавий спорт тури билан шуғулланиши учун зарур шарт-шароитларни яратиш, шунингдек, спорт мусобақаларини тизимли ўтказиб боришни йўлга қўйиш;

терма жамоалар ва профессионал спорт клублари учун спорт захирасини яратиш, иқтидорли ёш спортчиларни аниқлаш, танлаш ва саралаб олиш (селекция)нинг рақамлаштирилган тизимини жорий қилиш;

тренерлар, ҳакамлар ва мутахассисларни тайёрлаш, уларнинг малакасини ошириш ва қайта тайёрлаш тизимини янада такомиллаштириш;

жамоавий спорт турларини ривожлантириш мақсадида чет эллик мутахассисларни жалб этиш ва халқаро ҳамкорликни кенгайтириш;

жамоавий спорт турлари бўйича замонавий спорт объектларини барпо этиш, мавжудларининг моддий-техника базасини мустаҳкамлаш, уларни замонавий спорт анжомлари ва жиҳозлари билан таъминлаш.

2. Жамоавий спорт турлари билан мунтазам шуғулланишни ташкил қилиш ҳамда ушбу спорт турларини янада ривожлантириш бўйича “йўл харитаси” (кейинги ўринларда – “йўл харитаси”) иловага мувофиқ тасдиқлансин.

3. Ўзбекистон Республикаси Президентининг 2024 йил 15 ноябрдаги “Умумий ўрта таълим мактабларида жисмоний тарбия фани ўқитилишини тубдан такомиллаштириш ҳамда ушбу фан ўқитувчиларининг касбий фаолиятини ривожлантириш чора-тадбирлари тўғрисида”ги ПҚ–392-сон қарори билан 2025/2026 ўқув йилидан бошлаб ҳар бир мактабда босқичма-босқич мактаб спорт клублари фаолияти йўлга қўйилиши белгиланганлиги маълумот учун қабул қилинсин.

4. Белгилансинки, 2025/2026 ўқув йилидан бошлаб:

барча давлат университетларида волейбол, баскетбол, гандбол, регби, чим устида хоккей, сув полоси жамоавий спорт турлари бўйича, бошқа давлат олий таълим муассасаларида камида учта жамоавий спорт турлари бўйича спорт клублари ташкил этилади. Бунда олий таълим муассасаларининг спорт клублари фаолияти учун тегишли олий таълим муассасаси ректори (директори) шахсан масъул ҳисобланади;

спорт клуби раиси этиб олий таълим муассасаси ректори (директори) тайинланади, спорт клуби менежери лавозими эса олий таълим муассасаси кафедра мудири лавозимига тенглаштирилади;

олий таълим муассасаларига ўз спорт клубларини тегишли спорт базаларига беғараз асосда жойлаштириш ҳуқуқи берилади;

олий таълим муассасаларининг спорт клубларини сақлаш, уларни спорт жиҳозлари ва экипировкалари билан таъминлаш олий таълим муассасаларининг тўлов-контракт асосида ўқитишдан тушадиган маблағлари ва бюджетдан ташқари бошқа маблағлари ҳисобидан амалга оширилади;

олий таълим муассасаларининг ҳар йилги бюджетдан ташқари даромадлар ва харажатлар сметасида спорт клубларини сақлаш бўйича харажатлар кўзда тутилади.

Бунда олий таълим муассасаларининг спорт клублари фаолиятини мувофиқлаштириш, уларга ташкилий ва услубий кўмаклашиш Ўзбекистон талабалар спорти ассоциацияси томонидан амалга оширилади.

5. 2025/2026 ўқув йилидан бошлаб жамоавий спорт турлари бўйича:

а) Мактабгача ва мактаб таълими вазирлиги (Х.Умарова) Спорт вазирлиги (А.Икрамов) билан биргаликда умумий ўрта таълим мактаблари мактаб спорт клублари ўртасида **“Мактаб лигаси”**;

б) Олий таълим, фан ва инновациялар вазирлиги (К.Шарипов) Спорт вазирлиги (А.Икрамов) ҳамда Ўзбекистон талабалар спорти ассоциацияси билан биргаликда:

олий таълим муассасалари спорт клублари ўртасида **“Талабалар лигаси”** ва **“Олий таълим кубоги”**;

олий таълим муассасалари миқёсида **“Ректор кубоги”** спорт мусобақаларини ўтказиб боришни йўлга қўйсин.

6. Вазирлик ва идоралар, хўжалик бирлашмалари, давлат иштирокидаги тижорат банклари ва корхоналар (кейинги ўринларда – **идоравий ташкилотлар**) меҳнат жамоасининг соғлом турмуш тарзини қўллаб-қувватлаш ва жисмоний фаоллик даражасини ошириш мақсадида уларда **камида учта** жамоавий спорт турлари бўйича **спорт клублари** ташкил қилинади. Бунда:

иш вақтидан сўнг белгиланган кунларда (**ҳафтада камида бир марта**) идоравий ташкилотлар раҳбарлари меҳнат жамоасининг жамоавий спорт турлари билан шуғулланишини ташкил қилиш чораларини кўради;

жамоавий спорт турлари бўйича идоравий ташкилотлар кесимида **“Раҳбар кубоги”**, маҳаллий ҳокимликлар кесимида **“Ҳоким кубоги”** мусобақалари ўтказиб борилади;

спорт мусобақалари ғолиб ва совриндорлари спорт мусобақалари ташкилотчиларининг бюджетдан ташқари маблағлари ҳисобидан **молиявий рағбатлантириб борилади.**

7. Бизнес ҳамжамияти, Савдо-саноат палатаси ва жамоавий спорт турлари бўйича спорт федерациялари (уюшмалари)нинг:

тадбиркорлик субъектлари ходимларини жамоавий спорт турлари билан **мунтазам шуғулланиб боришга жалб қилиш;**

тадбиркорлик субъектларида жамоавий спорт турлари бўйича **спорт клубларини ташкил қилиш;**

тадбиркорлик субъектлари спорт клублари ўртасида **“Корпоратив спорт ўйинлари”** спорт мусобақасини ўтказиб бориш тўғрисидаги ташаббуслари маъқуллансин.

Бунда Савдо-саноат палатаси (Д.Вахабов) ва Спорт вазирлиги (А.Икрамов) хўжалик бирлашмалари билан биргаликда асосий фаолияти тадбиркорлик субъектларини спортга жалб қилиш ва улар ўртасида спорт мусобақаларини ўтказиб бориш бўлган **Ўзбекистон корпоратив спорт ассоциациясини** ташкил қилиш чораларини кўради.

8. Савдо-саноат палатаси (Д.Вахабов) Иқтисодиёт ва молия вазирлиги (И.Норқулов), Спорт вазирлиги (А.Икрамов) ва Солиқ қўмитаси (Ш.Кудбиев) билан биргаликда **2025 йил 1 июлга қадар** ходимларининг жамоавий спорт турлари билан шуғулланиши учун зарур шарт-шароитларни яратган тадбиркорлик субъектлари фаолиятини қўллаб-қувватлаш ҳамда жамоавий спорт турларига **ҳомийлик маблағларини** йўналтирганлик учун солиқ имтиёзларини тақдим қилиш бўйича Вазирлар Маҳкамасига таклиф киритсин.

9. Ўзбекистон маҳаллалари уюшмаси (Қ.Куранбаев) Спорт вазирлиги (А.Икрамов), Мактабгача ва мактаб таълими вазирлиги (Х.Умарова), Оила ва хотин-қизлар қўмитаси (З.Маҳкамова), Ёшлар ишлари агентлиги (А.Саъдуллаев) ва “Нуроний” жамғармаси (С.Турдиев) билан биргаликда:

“маҳалла еттилиги” имкониятларидан фойдаланган ҳолда ҳар бир маҳалла аҳолисини маҳалла ҳудудидаги мавжуд спорт инфратузилмаси ва умумий ўрта таълим мактаблари спорт иншоотларида жамоавий спорт турлари билан шуғулланишга жалб қилиб боришни йўлга қўйсин;

маҳаллалар ўртасида “Маҳалла лигаси” мусобақаларини ўтказиб борсин.

10. Спорт вазирлиги, Ўзбекистон Миллий олимпия қўмитаси, жамоавий спорт турлари бўйича спорт федерациялари (уюшмалари) ҳамда Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликларининг Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари ҳузурида жамоавий спорт турлари бўйича ҳудудий спорт клублари (кейинги ўринларда – **ҳудудий спорт клублари**) фаолиятини йўлга қўйиш тўғрисидаги таклифига розилик берилсин.

11. Қорақалпоғистон Республикаси Вазирлар Кенгашининг Раиси, вилоятлар ва Тошкент шаҳри ҳокимлари:

босқичма-босқич ҳудудий спорт клубларини **ривожлантириш** ва **молиялаштириш**, шунингдек, ҳудудий спорт клубларига **ҳомий ташкилотларни бириктириш** юзасидан зарур чора-тадбирларни амалга ошириб борсин;

жамоавий спорт турлари бўйича спорт федерациялари (уюшмалари)нинг ҳудудий бўлинмалари молиявий ва моддий-техник базасини мустаҳкамлашга кўмаклашсин;

тегишли ҳудудларнинг раҳбар кадрлари орасидан номзодларни жамоавий спорт турлари бўйича спорт федерациялари (уюшмалари)нинг ҳудудий бўлинмалари раҳбарлари лавозимига тавсия этиб борсин;

ҳудудий спорт клублари натижалари ва уларни ривожлантириш борасидаги муаммоларни муҳокама қилиб борсин.

Бунда Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликларига ҳудудий спорт клубларини сақлаш харажатларини амалга оширишда молиявий мустақиллик берилади.

12. Белгилаб қўйилсинки:

идоравий мансублиги ва мулкчилик шаклидан қатъи назар, спорт клублари юридик шахс мақоми билан ёки юридик шахс мақомисиз ташкил қилинади;

жамоавий спорт турлари бўйича спорт федерациялари (уюшмалари) томонидан спорт лигаларини ўтказиб бориш йўлга қўйилади;

спорт лигаларида мулкчилик ва ташкилий-ҳуқуқий шаклларида қатъи назар, ҳар қандай спорт клублари, шу жумладан, ҳудудий спорт клублари иштирок этади;

спорт лигаларини ўтказиб бориш тартиби жамоавий спорт турлари бўйича спорт федерациялари (уюшмалари) томонидан Спорт вазирлиги ва Ўзбекистон Миллий олимпия қўмитаси билан келишилган ҳолда тасдиқланади;

спорт лигаларини ўтказиб бориш билан боғлиқ харажатлар Спорт ва оммавий жисмоний тарбия тадбирларининг республика календарь режаси доирасида молиялаштирилади;

ҳудудий спорт клубларининг спорт лигаларидаги натижаларидан келиб чиқиб, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари рейтингини шакллантириш ва юритиш йўлга қўйилади.

13. Жамоавий спорт турлари бўйича юқори маҳоратли спортчилар ва малакали тренерларни тайёрлаш ҳамда спорт тайёргарлиги жараёнига халқаро стандартларни жорий қилиш мақсадида:

жамоавий спорт турлари бўйича миллий терма жамоалар аъзоларини мунтазам маҳаллий ва хорижий ўқув-йиғин машғулотларига юбориш йўлга қўйилади;

жамоавий спорт турлари бўйича таҳсил олаётган “Спорт фаолияти” бакалавриат йўналишлари талабаларини доимий маҳаллий ва хорижий ўқув-йиғин машғулотларига жалб қилиш ҳамда хорижлик мутахассисларга бириктириш тартиби жорий этилади.

Спорт вазирлиги (А.Икрамов) Ўзбекистон Миллий олимпия қўмитаси (О.Умаров) билан биргаликда жамоавий спорт турлари бўйича миллий терма жамоалар аъзоларини мунтазам маҳаллий ва хорижий ўқув-йиғин машғулотларига юбориш графигини тасдиқласин.

14. Белгилансинки, илғор технологияларни жорий қилиш орқали иқтидорли ёшларни саралаб олиш (селекция)нинг шаффоф тизимини жорий этиш мақсадида 2025–2027 йилларда “ERP-sport” ягона электрон бошқарув тизимида иқтидорли ёшларни аниқлаш, танлаш ва саралаб олиш (селекция) бўйича **техник имкониятлар** яратилади. Бунда:

ҳар бир жамоавий спорт тури бўйича **алоҳида мезонлар** ишлаб чиқилади;

спортчиларнинг жорий жисмоний ҳолати тўғрисидаги маълумотларни “ERP-sport” ягона электрон бошқарув тизимига юклав бориш механизми йўлга қўйилади;

сунъий интеллектдан фойдаланган ҳолда тўпланган маълумотларни таҳлил қилиш ҳамда **спортчиларнинг жисмоний ҳолати ва имкониятларини баҳолаш** тизими жорий этилади;

жамоавий спорт турлари бўйича иқтидорли спортчи ёшларни аниқлаш, танлаш ва саралаб олиш (селекция) жараёни **тўлиқ рақамлаштирилади**;

иқтидорли спортчи ёшларни аниқлаш, танлаш ва саралаб олиш бўйича (селекция) **техник имкониятлар** яратиш билан боғлиқ харажатлар Спортни қўллаб-қувватлаш жамғармаси маблағлари ҳисобидан молиялаштирилади.

15. Спорт вазирлиги, Ўзбекистон Миллий олимпия қўмитаси ва спорт федерациялари (уюшмалари)нинг Ўзбекистон Миллий олимпия қўмитаси ва олимпия спорт турлари бўйича спорт федерациялари (уюшмалари) ўртасида ўзаро мажбуриятлар келишувини тузиш тизимини йўлга қўйиш тўғрисидаги таклифига розилик берилсин.

Белгилансинки:

ўзаро мажбуриятлар келишуви Олимпия ўйинлари ўтказиладиган муддатга қадар тузилади;

Ўзаро мажбуриятлар келишувида спорт федерацияси (уюшмаси)нинг нуфузли халқаро спорт мусобақаларида юқори натижаларга эришиш бўйича вазифалари ва мажбуриятлари кўзда тутилади;

спорт федерацияси (уюшмаси)нинг нуфузли халқаро спорт мусобақаларидаги натижаларидан келиб чиқиб, уларнинг фаолиятини молиялаштириш миқдорлари белгилаб борилади.

Спорт вазирлиги (А.Икрамов) 2025 йил якунига қадар Ўзбекистон Миллий олимпия қўмитаси (О.Умаров) ва спорт федерациялари (уюшмалари) ўртасида ўзаро мажбуриятлар келишувини тузиш тартибини тасдиқлаш бўйича Ҳукумат қарори лойиҳасини Вазирлар Маҳкамасига киритсин.

16. Белгилаб қўйилсинки, Спорт вазирлиги томонидан ушбу қарор ва “Йўл харитаси”да кўзда тутилган **чора-тадбирларнинг ўз вақтида ва сифатли амалга оширилиши бўйича ҳар ярим йилда бир мартаба Вазирлар Маҳкамасига ахборот киритилади** ва Бош вазир ҳузурида муҳокама қилиб борилади.

17. Спорт вазирлиги (А.Икрамов):

манфаатдор вазирлик ва идоралар билан биргаликда **икки ой муддатда** ушбу қарорда кўрсатилган мусобақаларга пухта тайёргарлик кўриш ва уларни юқори савияда ўтказиш бўйича **чора-тадбирлар режасини тасдиқласин;**

уч ой муддатда манфаатдор вазирлик ва идоралар билан биргаликда қонунчилик ҳужжатларига ушбу қарордан келиб чиқадиган ўзгартириш ва қўшимчалар тўғрисидаги таклифларни Вазирлар Маҳкамасига киритсин.

18. Мазкур қарорнинг ижросини самарали ташкил қилишга масъул ва шахсий жавобгар этиб спорт вазири **А.И. Икрамов** белгилансин.

Қарор ижросини муҳокама қилиб бориш, ижро учун масъул ташкилотлар фаолиятини мувофиқлаштириш ва назорат қилиш Ўзбекистон Республикаси Бош вазири **А.Н. Арипов** ва Ўзбекистон Республикаси Президенти Администрацияси департаменти раҳбари **О.Қ. Абдурахманов** зиммасига юклансин.

Ўзбекистон Республикаси
Президенти



Ш. Мирзиёев

Тошкент шаҳри